


DIITABUUJA

 Kàdi bikèngela ùkwatè mudimu ne diitabuuja kùdì Nzambì, bwà kwenza ne òkwatè mudimu. Nwamònu anyi? Pa nàнку wèwè udi ne dibìikà dyà ku lufù dyèbè sungasunga munda mwèbè amu. Dibìikà dyèbè dyà ku lufù adi didi munda mwèbè, mu nyumà webè amu.

² Mpindyewu, nudi bamanyè's, pàakafwà Yesù pa nkùrusè, “Musùùkà Wèndè wàkapweka mu ifèrnò ne wàkayiisha misùùkà yìvwà mu bùlokò, yìvwà kayiyi minyingalàle mu matùkù a lutùulù a Noà.” Mubidi Wèndè wàkaya mu lukità. Kàdi, kumpalà kwà Yèyè kufwà, Wàkalàmbula Nyumà Wèndè mu byanza byà Nzambì. Mu cyanza . . . “Mu byanza Byèbè Ndi ndàmbula Nyumà Wanyi.” Pa nàнку, nudi numòna's, Nyumà Wèndè wàkaya kùdì Nzambì; musùùkà Wèndè wàkaya mu ifèrnò; mubidi Wèndè wàkaya ku lukità.

³ Mpindyewu, Nyumà uvwa munda Mwèndè awu ùvwa Nyumà wa Nzambì. “Nyumà awu, mu bikondo byà kale ne mu mishindù mishilèshilàngàne, wàkalaaba baprófeta, bwà kutwàdilabò cisàmbà Mukenji; mu matùkù a ndekeelu, ku Kilistò; nènku mpindyewu, mu matùkù aa nùнку, ku Èvànjeeliyò.” Mpindyewu, patùdì tupeta Kilistò munda mwà mwoyi wètù, ki cyònsò cidi citùkèngelà. Ki Mwoyi wà Cyendèlèlè.

⁴ Mpindyewu, Kilistò kàvwa mwà kwalukila matùkù àsatù kaayi makùmbàne to. Bwalu, Nyumà Wèndè ùvwa paanyimà pàà lumwènù lwà bindidimbì, lwenzè bu dibaya, mùshindù *ewu*, bwà Yèyè kàmònu mwà kusambuka mukàlù awu to, bwalu civwa n'Díyi dyàkula dyà Nzambì, ne: “Ùvwa ne cyà kulàala mu lukità munda mwà matùkù àsatù a muunyà ne a bufùkù.” Mpindyewu, Yèyè kàvwa mwà kwalukila pàvwa matùkù àsatù a muunyà ne a bufùkù awu kaayi majikè to. Nènku pàakajikà matùkù àsatù a muunyà ne a bufùkù awu, Nyumà Wèndè wàkasùuludiibwa. Wàkaya buludi kùdì musùùkà Wèndè, nènku musùùkà Wèndè wàkaalukila ne kwangata mubidi, ne wàkuuja civwàYe mwambè aci ne: “Ndi ne bukolè bwà kutèeka mwoyi Wànyi pànshì. Ndi ne bukolè bwà kuwàngata cyàkàbìdì. Ndi ne bukolè.”

⁵ Mpindyewu, yònsò wa kunùdì ùdi ne bukolè, mùshindù wùm wèwùm wè awu, bwalu nudi bânà bàà Nzambì bàà balùmè ne bàà bakàji. Ne Nyumà mwìnè udi munda mwèbè awu, mu dindà emu, Nyumà Mwìmpè udi munda mwèbè mu dindà emu awu, Nyumà Mwìmpè umwèumwè awu ngwàkubiisha ku lufù. Pa nàнку, wèwè udi ne bukolè bwà kudibiisha wèwè mwìnè ku lufù.

6 Pawàfwà, musùukà wèbè newùye mu—mu... mwinshì mwà cyoshelu cyà Nzambì, kabìyi mu... mu Bwikadi mene bwà Nzambì to. Mpindyewu, nyumà webè neàye kùdi Nzambì, kàdi wèwè kwéna mwà kwalukila to. Vùlukaàyi ne, mu Bible, mMwambè ne nyumà... “Misùukà mwinshì mwà cyoshelu, yèla lubilà ne: ‘Mukalenge, too ne dībà kaayi, too ne dībà kaayi?’” Ne bôbò kabàvwa mwà kwalukila pàvwà Mifundu kayiyi myùle to, ne, ànu mùvwà Kilistò amu, kàvwa mwà kwalukila pàvwà Mifundu kayiyi myùle to. Pashiishe, paanyimà, pàà byònsò abi bimanè kwenzeka, dikènga dyònsò dimanè kujika, ne bânà bààbò bamanè kukènga bintu bìmwèbìmwè abi, anyi pàà twètù bamanè kukènga mwàkakèngabo bôbò amu, ne bikwàbò; pashiishe, mu ditùkù adi, neùmanyè ànu menemene mwaba wùdi mujiikiibwe, nyumà webè neàsuuludiibwè ùmuka kùdi Nzambì ne neàlwe kùdi musùukà.

7 Mpindyewu, musùukà nciùpà cyà ku wèwè cìdì cimanya ne cyùmva, meeji èbè. Nudi bavùlùke cikèèna—kumòna cìmvwà mumòne ànu àbìdì àdì panshi aa, anyi ditentemunyiibwa dikesè adi, mukabwelè mu mwaba awu ne mukamòne bantu abu aci anyi? [Disangisha didi dyàmba ne: “Amen.”—Muf.] Mpindyewu, nyumà webè neàpinganè kùdi mubidi awu, ne mubidi wa—wa mùshindù awu awu, musùukà, wùdi mubidi wùdi kawùyi wùkèngelà bwà kudyà ne bikwàbò abi to. “Ntentà wa pa buloba ewu yèye munyangùke, tukàadi ne mukwàbò mwindile,” mubidi wà mu dyulu. Nènkù mwikàle ne nyumà awu, ne musùukà awu ne mubidi wà mu dyulu awu, neùbiishè ku lufù mubidi wà mu bufùki ewu bwà Bukalenge bunènè bwà bidimu cinunu abu. Nwamònu anyi? Udi ne bukolè munda mwebè mpindyewu, bwà kwenza nànkù, mpindyewu, kàdi bukolè bùdì naabù munda mwèbè mpindyewu abu’s mbufwànyine kufùka buloba bupyabupyà. Nzambì kàtu ne tuumyaba tukesè, twà butekète, ne myaba minène, yà bujitu miikàle yà bukolè to, dilengiibwa dyà ditàmbe bukesè dyà kùdi Nzambì ndyà bukolè bwònsò, nwamònu’s, dilengiibwa dyà ditàmbe bukesè dyà kùdi Nzambì adi.

8 Pa nànkù, wèwè udi mumanyè, pa nànkù ndi nteeta bwà kukubweja mu diitabuuja mpindyewu, udi mumanyè ne cintu kampànda neikwenzèkèle, wèwè bu mwena Kilistò. Nudi bamanyè anyi? [Disangisha didi dyàmba ne: “Amen.”—Muf.] Wèwè kale wàwa uvwa wendela panshi *apa* mu bitoci, mwikàle ne bitoci byònsò abi ne mpèkaatù, ne unwà maalà, ne unàya twarta twà mfrangà, ne—ne bintu byà pa buloba. Èè, udi mwenzè ànu witabuuja ne Kilistò wàkufwidi luse ku mpèkaatù yèbè, wèwè kujuuka e kubànda kumutù kwà bintàkanyì abi. Mpindyewu ukàadi wendela kuulu *eku*, nwamònu’s, kumutù kwà byònsò abi. Bwà cinyi? Bwalu udi witabuuja ne udi mwena Kilistò. Dībà adi pawitàbì Kilistò, ne pàalu Nyumà Mwìmpè kùdi, dībà adi udi ne diitabuuja kùdi Nyumà Mwìmpè, aci

cidi cìkupèèsha bukolè bwà kwendela kuulu kwà nsòmbelu wa mpèkaatù wa mùshindù awu awu.

⁹ Èè, mpindyewu, cintu cìmwèpelè cidi cìkukèngela kwenza, bwà kwendela kuulu ne kubwela mu dyondopa, nkwikala ànu ne diitabuuja dyàbùngi, kutùngunuka ànu—ànu ne kudisàka pambèlu. Nwamònu anyi? Nènku ki bwalu mbwòbù abu's. Mpindyewu díbà adi paùdi usaama, ne kùyi mwena Kilistò to, shààla mwena Kilistò mpindyewu mene, bwà bukolè bwà dyondopa abu bùlwe munda mwèbè, ku dilwa mwena Kilistò. Nènku aci necìkupèèshè diitabuuja dyà kwendela kuulu kwà mpèkaatù. Necìkupèèshè diitabuuja. Ne byònsò bìdi bìkukèngela, mu lwendu elu, bìdi munda mwèbè mene mpindyewu. Nènku cintu cìmwèpelè cidi cìkukèngela nkwikala ne diitabuuja kùdi Nzambì, cidi cisàka bintu bìmpè abi pambèlù pèèbè, bìdi munda mwèbè abi, ku Nyumà Mwìmpè. Numvù bitòoke tòò mpindyewu anyi? Nwacyùmvù anyi?

¹⁰ Ngeela meeji ne Billy mmungambile, makèèlèlè dilòlò awu, mumbiikile wàmba ne: “Lwàku, mu dindà emu, nangàngà bwà muntu umwèpelè udi mulwe ewu, mwelè meeji ne tudi twenza masangisha mu lumingu elu, a Bitampi Mwandamutekète.” Nènku ùvwa muulwè ne mwànà ùsaama, ngeela meeji. Nènku pawikalà mwaba ewu mpindyewu, mukalenge, vùlukà ne, kwèna mwà...Nebikengelè bwà diitabuuja dyèbè—dyèbè dikwatè mudimu bwà mwànà awu, piikalàye—piikalàye mwànà mukesè, wa pambidi.

¹¹ Kàdi mpindyewu ngǎnji kwangata mukwàbò Mufùndu, piikalàbi byakàne, bwà katanci kakesè cyanààna. [Mwanèètù Neville udi wàmba ne: “Tùngunukà wèwè ànu nàka, Mwanèètù. Amen.”—Muf.]

¹² Vùlukàayi ànu ne, mpindyewu, mu maÈvànjeeliyò, tudi tubala mu nshapità wa 16, ngeela meeji, wa Byenzedi, mùvwà Pòlò ne Siilà mu bùlokò bufùkù kampànda. Ne bàvwa batuuciibwe bwalu bàvwa biipàte nyumà wa démon munda mwà nsongàakàji kampànda mwena lubùkù. Nènku ciywa... Nènku, yèyè awu, bamfùmù bèndè bàvwa bafiike munda bwà cyòci aci. Ki kubàtuutabò, kubèèleshabò mu bùlokò bwà munda menemene. Ne pashiishe pàakenzàbo aci, pàvwà Pòlò ne Siilà munkaci mwà kusambila, ki Nzambì kutùmaYè dizakala dyà buloba ne kunyùkusha Yè bùlokò abu ne kubùpulaYè.

¹³ Mulami wa bùlokò wa beena Filipò awu, mwikàle kààmàndà kàà màsàlaayi lukàmà, pààbi bìvwa ne, kujìmija kwà beena bùlokò bèndè—bèndè, bìvwa bikèngela bwà mwoyi wèndè sungasunga kufuciibwawù bwà beena bùlokò abu. Kutùulayè mwelè wèndè wà mvità ne kuswàye bwà kudishebeya, pàakayà Pòlò lubilu kwamba ne: “Kùdyènzèdikù bibi to. Twètù bònsò tudikù.”

¹⁴ Nènku kààmàndà kàà màsàlaayi lukàmà awu, twàmbè ne, ùvwa ne didifwànyikijila kampànda divwàbo naadi bwà

Pòlò ne bakwàbò abu. Bàvwa bafwànyine kwikala bimbe misambu. Bàvwa bafwànyine kwikala bafile majaadiki, anyi benzè cintu kampànda. Kàdi, cyònsò cìvwàku aci, bàakamanya ne bàvwa bantu bàà cijila. Bàakamanya ne kùvwa cintu kampànda cyà cishìllàngàne mu bantu abu. Bwalu, ne lùkàsà lwònsò, yéyè kukonka ne: “Ndi ne cyà kwenza cinyi bwà mèmè kusungidiibwa? Ndi ne cyà kwenza cinyi bwà mèmè kusungidiibwa?”

15 Mpindyewu, Pòlò kwambayè ne: “Itàbùùjà Mukalenge Yesù Kilistò, ne wèwè ne bàà mu nzùbù mwèbè nenùsungidiibwè.”

16 Èè, mpindyewu, piikalàbi ne kwitabuuja Mukalenge Yesù Kilistò. . . Kí mwena kwamba ne lupandu lwèndè *yéyè* lùvwa lufwànyine kusungila bàà mu nzùbù wèndè to. Kadi yéyè ne diitabuuja dikùmbàne kùdi Nzambì bwà lupàndù lwèndè yéyè mwinè, ùdi mwà kwikala ne diitabuuja dimwèdimwè adi bwà bàà mu nzùbù mwèndè. Ne bàà mu nzùbù mwèndè nebiikalè ne cyà kubwela, nwamònu’s, cintu cimwècimwè aci.

17 Byà mwomùmwè ne mwàkenzà Yobò, mùmvwà ngamba dilòlò adi, mu Géorgie mwàmwa, ku disangisha kampànda. Mèmè kwamba ne: “Yobò, kwambayè ne: ‘Mpindyewu, ncyèna mumanyè bânà bàànyì nì mbenzè mpèkaatù, kàdi àpu nì mbenzè mpèkaatù?’” Nènku Yobò ùvwa ne cintu cimwèpelè cyà dyenza, bwa kwikalayè mwakàne, cìvwa, nkulàmbula mulàmbù wà dyosha. Wàkamba ne ùvwa mwà kulàmbula mulàmbù wà dyosha, piikalàbi ne bânà bèndè bàvwa benzè mpèkaatù, díbà adi bàvwa bafwànyine kufwidiibwa luse ku mpèkaatù wabò. Nènku cìvwa cintu cìmpè cyàkenzà taatù awu. Awu ntaatù wa ngeelèlù mwìmpè wa meeji. Bìdi bitùkèngela baataatù bààbúngì bàà mùshindù awu leelù ewu. Kì Yobò kulàmbulayè mulàmbù wà dyosha awu. Aci cìvwa nkumpàlà kwà dikèngà dyèndè kubangadi.

18 Kàdi pàakafwà bânà bèndè abu bònsò, ne mìkòòkò yèndè yònsò mìbùtula, ne byònsò bìvwàye naabi, byangata, ùkaavwa musòmbe pa mushikì wà butù kumfundu kwà nzùbu wèndè, ùdikoonyà ne cìyooyi.

19 Nukààvwakù bamòne, paanyimà pàà matùkù a dikèngà dyèndè adi apu, pàakabangà Nzambi kumwalujulwila bintu apu anyi? Mwaba wùvwàye ne ngombe binunu dikùmi, ne bikwàbò, Yéyè wàkaaluja misangu yìbìdì. Ne misangu yìbìdì mìkòòkò yèndè, kuvudija bintu byònsò misangu yìbìdì. Kàdi nukààvwakù bamòne anyi? Ne Nzambi wàkapèèsha kàbìdì Yobò bânà bèndè mwandamutekète abu. Nukààvwakù beelè meeji mwaba wùvwàbo anyi? Mulàmbù wà dyosha awu wùvwa mwangàte kaaba kààbò. Bàvwa basungidiibwe, mu Butumbi, bamwindìle bwà kulwàye. Ùdi pàmwè naabò leelù ewu. “Wèwè ne bàà mu nzùbù mwèbè nenùsungidiibwè.” Nwamònu anyi? Mpindyewu, Yobò ùvwa ne cintu cimwèpelè cyà dyenza, bwà kwikalayè mwakàne, cìvwa nkulàmbula mulàmbù wà dyosha.

20 Wêwè udi ne cintu cimwèpelè cyà dyenza, bwà kwikala mwakàne, ncyà ne, kwikala ne diitabuuja kùdì Nzambi. Bwalu, ku diitabuuja nkùdì usùngidiibwa, ku diitabuuja nkùdì wondopiibwa, ku diitabuuja nkùdì upeta byònsò byùdì naabì. Nwamònu anyi? Ku diitabuuja, nkùdì uciitàbuuja. Mpindyewu: “Itàbùùjà Mukalenge Yesù Kilistò, ne wêwè ne bàà mu nzùbù mwèbè nenùsungidiibwè.”

21 Mpindyewu, mukalenge, wêwè ne mwànà awu mwaba ewu bwà kumusambidila, itàbùùjà, wêwè mwinè. Ndi mwaba ewu bwà kutèèka diitabuuja dyànyì pàmwè ne dyèbè, nènku netwìtabuuje, bònsò pàmwè ne, Nzambi neòndopè mwànà awu.

22 Nudi numòna’s, tudi ne bukolè abu munda mwètù bwà kwenza nàнку. Wêwè udi ne bukolè abu mu wêwè bwà kucyènza. Mwena Kilistò yònsò ùdì ne bukolè abu bwà kucyènza. Kàdì mpindyewu bu twètù ànu mwà kupeta...Bukolè abu mbukòntònòna kùdì mukenji kampànda.

23 Ànu múnkaadì mwambàmbè misangu yàbùngì, bidì ànu mùdì dikòkiibwa dyà kùdì buloba dikòntonona màyi’s, bwalu mmukenji. Dikòkiibwa dyà kùdì buloba ditu dikòntonona màyi.

24 Dìbà, didì dikòntononyiibwa kùdì—kùdì...anyi buloba, dinyùnguluka dyà buloba. Kwènà ànu mwà kwenzeja dìbà cintu cimwè, pashìshe kwamba ne: “Ngeela meeji ne ndi muswè kulààla kabidì ndambù. Anji indilàku dìbà dimwè” to. Kadyàkucyènza to, nwamònu’s, bwalu kùdì mukenji kampànda. Wêwè ukwàta mudimu bilondèshìle mukenji awu, èè, dìbà adi, byònsò nebiikalè bìmpè. Wêwè uya kalààla pa dìbà, s’udi mwà kutàbuluka pa dìbà. Ne bu wêwè... .

25 Ànu mutùdì ne Dijiba dyà Superior, Dijiba dyà Ontario, Dijiba dyà Huron, ne Majiba Manène ònsò awu mwaba ewu. Tudi ne binunu makùmi kuvudija ku binunu byà hectares yà buloba mu Nevada, ne mu Californie, ne mu Arizona, ne mu Nouveau Mexique, yidì munkaci mwà kwoshika, bwà dipanga màyi awu, buloba mùdìbo bafwànyineku kukùna ní ncinyi cyònsò. Udi mufwànyine kudiisha bàà pa buloba bujimà, kuntwaku, bu wêwè ne màyi aa, àdì apa nùнку aa, kuntwaku. Ne kí mmafwànyine kutàcishiibwakù to, bwalu àdì àpetela màyi ku misùlù. Padiwu ànu ne àyi, àdì àlukila cyàkàbidì mu cipidì, bwalu dikòkiibwa dyà kùdì buloba didì diàlama mu mwaba awu. Èè, mpindyewu, bu wêwè mwà kukwàta mudimu bilondèshìle mukenji wà dikòkiibwa dyà kùdì buloba, udi mwà kwangata Majiba Manène ònsò aa ne kutùma màyi mu ditùngà dijimà kuntwaku, ne kudiisha buloba bujimà, muntu nànsha umwe kàvwakù mufwànyine kwikala ne nzala to. Kàdì kwèna mwà kwikala musòmbe apa wamba ne: “Èyowà. Ngàcimònu. Bushùwà.” Bìkèngela ùcyènzè.

26 Èè, ki mùshindù wùmèwèwè awu wùdìbì nku mukenji wà Nzambi. Mukenji wà Nzambi ndiitabuuja. Nènku tudi

ne diitabuuja mwaba ewu, mu dindà emu, bwà kwondopa bubèèdi kanà bwónsò, bwà kwenza cintu kanà cyónsò. Kàdi ndikòntonona kùdi mukenji kampànda, ne mukenji awu ndiitabuuja. Mukenji wà Nzambì ndiitabuuja. Yesù wákamba ne: “Bintu kanà byónsò binùkààjingì, panùdi nusambila, nwènù mwà kwitabuuja ne nudi nubipeta, nudi mwà kubipeta.” Ki bwalu mbwòbù abu’s. Pa nàнку, diitabuuja ndidi dìcikòntonona, ne diitabuuja nditùpèèsha ànu bilondèshile mutùdi naadi lukèngelu. Mpindyewu, bikèngela bwà twètù. . . Nzambì ùdi wàbanyina bàmwè bàà kutùdi diitabuuja kampànda, bàmwè dikwàbò diitabuuja. Kí mbukolè kampànda bwà butambe mfùkilu bùdi naabù wèwè to. Bwalu paùdi ulwa mwena Kilistò, ukààdi—ukààdi mumanè kwikala ne bukolè abu, kàdi udi mupangè diitabuuja bwà kukwàcisha bukolè abu mudimu.

²⁷ Pa nàнку mpindyewu, mu dindà emu, paùdi ulwa bwà kukusambidilabò, vùlukà ne, Bible mmwambè nùнку. Eci ncilelèlà. Yakòbò 5.14: “Kwòkò muntu munkaci mwènù, mubèèdi, àbiikidishè bakùlù bàà èkèleeziyà. Bàmulaabè maanyi, ne bàmusambidilè. Disambila dyà diitabuuja nedisungilè mubèèdi awu, ne Nzambì neàmujulè panshì.” Mmulayi, wèwè mucitàbùùje. Ki bwà cinyì, nwamònu’s, dyondopiibwa ndyabanyina muntu nkààya.

²⁸ Bìvwa nàнку mu matùkù a Yesù wa ku Nazalèetà. Yèyè kàvwa mwà kwondopa bantu bibèngàngàne—bibèngàngàne ne diitabuuja dyàbò to. Yèyè ùvwa wàmba ne: “Ndi mwà kwondopa, wèwè mwitàbùùje. Wèwè mwitàbùùje ne Mèmè ndi mwà kwenza cyòci eci, Ndi mwà kucyèna.” Wèwè mwà kuciitabuuja!

²⁹ Pa nàнку, bàmwè bantu bàtu bàkùpa—bàkùpa bukolè bwà dyondopa mu kampànda mukwàbò, batangadiki. Kí ng’aci to. Bukolè bwà dyondopiibwa bùdi munda mwèbè. Bùdi munda mwèbè. Bòbò bàdi ànu bàtèeka ditempu kumpàlà kwà kabalù. Mutangadiki kì ngudi ne bukolè bwà dyondopa nànsha.

³⁰ Nyumà Mwímpè ngudi ne bukolè bwà kwondopa, ne wèwè udi ne Nyumà Mwímpè. Aci nkaamucì kakesè kaùdi wèwè, ne bintu byónsò bìdi bìkukèngela abi bìdi munda mwèbè wèwè amu. Nènku, ki bwà cinyì, udi wèwè ànu ubanga kunwina ku mulayi wà Nzambì, wamba ne: “Mbulelèlà. Nzambì mmwambè ne Yèyè nguvwa mwà kungondopa. ‘Ku mibùnda bùnda Yèndè nkùndi mwondòpiibwe.’” Ki bwalu mbwòbù abu’s. Udi mumanè cyùdi wenza anyi? Udi ubanga kusàka dyondopa dipàtuka pambèlu, kwàjikì. Nwamònu anyi? Ki pashùshe, bakwàbò bàdi mwà kumòna cyùdi naaci aci.

³¹ Mpindyewu bìdi ne: “Diitabuuja ndilenga dyà bintu bitèkemena, cilejei cyà bintu bìdi kabìyi bìmwèka.”

³² Ndi mufwànyine kukùna kaamucì kakesè aku pambèlu. Mèmè ncyèna mmòna bimuma byà pommes abi to, kàdi bìdi

munda amu. Kaamuci kakesè aku nkamanyè ne bidimù. Nènku kàdi kàbanga ànu kunwà, kàsàka ànu kusàka, bwalu nkamanyè ne: “Bìdi munda mwànyì emu. Ném̀bìpàtùle pambèlu apa paanyimà pàà cikondo kampànda. Mpèèshèku ànu cikondo ndambù. Ndamèku ànu cikondo ndambù.” Kàdi kàtùngunuka ànu ne kunwà. “Èyowà, ndi mumanyè ne bimuma byà pommes bìdi munda mwànyì emu. Ném̀bìpàtùle, paanyimà pàà cikondo kampànda.” Nènku katanci aka, ki byòbi byàlu ebi. Ki bimuma byà pommes byàlu abi, bwalu kòkò kàvwa kiitabùùje ne bìdi munda mwàkù amu.

³³ Nènku wèwè m̀witabùùje ne bukolè bwà Nyumà Mwìmpè bùdi munda mwèbè amu, bwà kukwondopa, ki bwalu mbwòbù abu’s. Tùngunukà wèwè ànu ne kusàka. Wamònu anyi? Wèwè udi ne diitabuuja. Kwèna mwà kumòna bipèta dyàkamwè to. Kwèna ubimòna to.

³⁴ Mpindyewu, nwamònu’s, Yakòbò wàkabingisha Abraham ku byenzedi byèndè. Pòlò yèyè wàkabingisha Abraham ku diitabuuja dyèndè. Citùdi twamba díbà adi ncinyì, pankaci pàà bàbìdi abu? Abraham ùvwa wàkula pa cìdi. . . Ndi njinga kwamba ne, Pòlò ùvwa wàkula pa cìvwa Nzambi mumòne mu Abraham. Kàdi Yakòbò ùvwa wàkula pa cìvwa bantu bamòne mu Abraham. Nwamònu anyi? Mpindyewu, nwamònu anyi?

³⁵ Pa nàнку, Nzambi ùvwa mumanyè, kumpàlà kwà mwànà awu kulwayè ne, Abraham ùvwa ne diitabuuja. Ne Abraham wàkaci jaadikila Nzambi, mu kwenza kwa maalu (yèyè) bu ne mwànà awu ùvwa mwà kulwa pàvwàye kàyi ùlela apu. Yèyè kàvwa ne bânà to. Matrice a mukàjèndè àkaavwa mafwè, ne mùlume kàvwa ùlela to. Kàdi, nànsha nàнку, ùvwa mumanyè ne: “Mwómò amu mwaba kampànda mùvwa mwànà awu.” Nudi numòna’s, yèyè ùvwa mutùngùnùke ànu ne kùnwà mulayi awu, mweyèmène pa El-Shaddai munène wa Nzambi, *Dibèèle* adi. Mweyèmènepù, mwikàle ùnwa, mumanyè ne Nzambi ùvwa mwà kumupèèshayè; mumanyè ne cìvwa mmulayi, ne Yèyè ùvwa ne cyà kucyènza.

³⁶ Ne twètù tudi bânà bàà Abraham. Pa nàнку twìkalàayi beeyèmène pa mulayi Wendè, ne bakwàtekù, bamanyè ne Nzambi neàcyènzè. Yèyè ngudi mucyàmbè. Nudi nuciitabuuja mpindyewu anyi? [Disangisha dìdi dyàm̀ba ne: “Amen.”—Muf.]

³⁷ Díbà adi enzàayi mulongo wà babèèdi ku lùm̀wè lwà ku nseke anyi lukwàbò alu, aba bàdi baswè bwà kubàsambilabò. Ne twètù bapètè mukùlù kaaba aka bwà kubalaaba maanyi, mèmè nèm̀bàsambidilè, ne netwitabuuje ne Nzambi neàsangajè yònsò wa kùdìbo. “Bu wèwè mwà kwitabuuja.”

³⁸ Teddy, udi penyì? Vwilà pabwìpì ku luseke lwà ku dyàbalùme elu. Abi mbìmpè. Nènku ndi muswè wìmbèku ku cisanji *Itabùùjà Nàka*.

39 Nènku pàcìdìbò bènda bàlwa apu, twǎnjàayi ànu kwinyika mitù yètù, bakwàbò bàà ku batèeleji abu, nènku twikalàayi mu disambila bwà bantu bàdì bènda bàlwa aba.

40 Taatù wetù wa mu Dyulu, nyewu tulwa Kùdì, mu dindà emu, mu Dìná dyà Yesù Kilistò, bantu bàdì bakwàte ne byà luse, babèèdì, bàkènga biikàle mu mùshindù mubyàmùbyalè, wà dikènga dyà cimpicìmpi ewu abu. Mèmè ndi nKwitabuuja Wèwè, Mukalenge. Ndi—ndi mumanyè ne Mèyi Èbè mmalelèlè. Mmalelèlè menemene! KaÈnakù mwà kupangila to, bwalu Àdi Dìyi dyà Cyendèlèlè ne dyà kashidi dyà Nzambì. Àdi ònsò a bukòlè, mùdì Nzambì amu, bwalu Àdi citùpà cyà ku Yèyè. “Ku cibangidilu kwàkadi Dìyi, ne Dìyi dyàkadi ne Nzambì, ne Dìyi dyàkadi Nzambì. Ne Dìyi dyàkalwa mubidi ne dyàkasòmbela munkaci mwètù.” Mpindyewu, tudi twitabuuja aci, Mukalenge, ne myoyi yètù yònsò, ne musùukà wètù wònsò, ne byònsò bidì munda mwètù. Tudi tucìitabuuja.

41 Nènku nyewù ngàateeci, mu mùshindù mupwekèle, wà bwànà, bwà kucileeja bantu, bwà bààmònakù mwà kuumvwa ne kumanya ne Bukole bwà Nzambì bùdi bùsanganyibwa munda mwàbò. Bu bòbò ànu mwà kwikala ne diitabuuja dyàbò adi ne kulonda mèyi matùma à Nzambì's wè!

42 Mùshindù awu ngùdìbò basùngidìibwe. Mbalwè ne banyingàlale ku mpèkaatù yàbò, ne babatìijìibwe mu Dìná dyà Yesù Kilistò, bilondèshile Bible ewu, Byenzedi 2. Ki pashiishe Peetèlò kwambayè, ne: “Nenùpetè dipà dyà Nyumà Mwimpè.” Ki Dyòdì didì dilwè edi, anu menemene, bwalu Dìdi Dìyi dyà Nzambì òmwènèshìibwe.

43 Èè, mpindyewu, cintu cìmwècìmwè aci, Taatù, tudi bamanyè ne ncilelèlè, patùdì tulaaba babèèdì maanyi apa, ne tubàsambidila apa. “Disambila dyà diitabuuja nedisungilè mubèèdì. Nzambì neàmjuulè panshì.” Nzambì, swàku bwà muntu ne muntu ùmukè ku cyoshelu eci, mu nyùngulukilu wa mwab'ewu mu dindà emu, ne disànkà dyàbùngì wènda ùcyònkòmòka, mumanyè ne Nzambì wàmwondòpù. “Ndaàku, ne ùsangalè.” Bwalu tudi tubàlambula Kùdì Wèwè mpindyewu, mu Dìná dyà Yesù Kilistò.

44 Ne swàku bwà muntu ne muntu òndopiibwè, ne àbakulè cìkèènà-kumòna aci, cìdìci cyùmvwija aci, ànu mùvwà Abraham amu, kubiikila bintu bidì kabiyikù abi bu ne bidìku amu, bipeta nànsha biikàle byà bishi, abi kabyèna ne cyà dyenza ne diitabuuja to. Bipeta abi ncintu cyanààna. Diitabuuja ndimanè kukwàta. “Ne diitabuuja ndilenga dyà bintu bitèkemena, ne cileeji cyà bintu bidì kabiyi bimwènèka.” Nzambì, swàku cipwekè too ne mu ndòndò mu myoyi yàbò, bwalu bàdì Neebè dijinga.

45 Nyààya bu musadidi Webè mupwekèle, bwà kwimana pàmwè ne basadidi bakwàbò, ne kulòmba Nzambì bwà kutèeka

munda mwà myoyi yètù bwalu bwà babèèdi aba. Tudi tulòmba nùnkù mu Dinà dyà Yesù. Amen.

46 Muntu kampàndà ùvwa wàmba ne Mwanèètù Estle Beeler ùvwa mu citanda emu. Ne ndi ngeela meeji ne kùdi mwambi mukwàbò kaaba aka, uvwa mulombòle disambila, mu dindà emu. Tudi baswè kulòmbakù bambi bònsò bàdi kaaba aka, nànsha biikàle banganyi, ní nudikù mwà kulwa kùneeku ne kwimana banyùngùlùkile cyoshelu eci, bwà katanci kakesè cyanàànà, bu nwènu mwà kuswà, bânà bèètù. Ne bantu balùme... Mwanèètù Ben, twasàkidila. Lwâyi buludi nwimanè pabwîpî apa, mu nyùngulukilu wa cyoshelu emu, bwà twamònakù mwà kwenza disambila pàmwè ne bantu aba, kubàtentekela byanza.

47 Mpindyewu, pàdìbo bìmba musambu awu ku cisanji apu. Nènku bambi bàdi munkaci mwà kwangata kaaba kààbò mwab'ewu, bwà twètù, muntu ne muntu, tùmone mwà kutentekela babèèdi byanza.

48 Tùmonebi, udi wenda upweka ku luseke lukwàbò lwà mukùnà kwàka. Ndi mmòna Muntu wènda ulwa, kàyi mushiilàngàne ne mukwàbò muntu kanà yònsò ewu to. Ùvwa ànu Muntu wetù wa pàtupù ewu, mwenzè bu wa mubidi mukesè, mwenzè mutekètàngàne. Patùdi tuMumòna ùtàngila, mèsù Endè mapwekesha pa—pa bwalu bùdi bwènzekà mu cibandabanda mwàmwa. Bávwa mbapostòlò Bèndè. Bávwa ne mwànà wa balùme kampànda muntwamu, uvwa ne ciseki, ne kakùyi mpatà to bávwa bàmba ne: “Mwondòpèku, Mukalenge! Mwondòpèku!”

49 Kàdi, nudi numòna's, ànu kwamba kwà ne: “Mwondòpèku, Mukalenge, mwondòpèku,” kakwàkucyènzakù to. Aci kacyàkucyènzakù to. Bikèngela kwikalèku cintu kampànda paanyimà pàà cyà ne, “Mwondòpèku, Mukalenge, mwondòpèku” aci. Nwamònu anyi? Nènku bu mèmè mwà kukufikisha ku diitabuuja cyòci aci, ne kwitabuuja aci ne mwoyi wèbè wònsò ne, neòndopiibwè, bu mèmè mwà kunùfikisha bulelèlè ku dimòna cikèènà-kumòna.

50 Mpindyewu tàngilàayi, bayiidi bàdi biimàne mwaba awu abu, pàmwàpa biikàle bàmunyùkulula, pàmwàpa bàmusàka bikolè ne: “Cítàbùùjè, Mwanèètù! Cítàbùùjè! Àlèluuyàh! Cítàbùùjè! Mwondòpèku, Mukalenge! Mwondòpèku!” Kàdi démon awu wàkashààla ànu mwab'awu, bwalu kàvwa musangàne diitabuuja dikùmbàne bwà kuumumusha to.

51 Kàdi ki Kampànda udi upweka kakùnà ewu. Kàdi démon awu mmwenzè ànu ùjingulula ne Aci cìvwakù cishiilàngàne ne bakwàbò bantu! Nwamònu anyi?

52 Mpindyewu, bantu bàà mùshindù awu ki batùdi baswè kwikalà naabò kuntwaku, bu mùdi Mukalenge wetù Yesù. Eyowà. Kabiyi bwà kulwa ànu bwà didileeya cyanàànà to, kàdi

kulwa, banangè Nzambi wetù, bamanyè ne tudi batùmìibwe ne mudimu bwà kwenza cyôci eci. Eci ki mudimu mutütùma naawù.

⁵³ Pashiishe, pàakayàYè kùdi taatù, ngeela meeji ne apa ki pàdi musambu ewu mufùndila, musàkila pa Dîyi, kwambayè ne: “Mukalenge, ikàlàku luse ne mwanàanyi wa balùme, bwalu ùdi ùtàcishiibwa mu mishindù mishilèshilàngàne kùdi démon.” Yèyè ne: “Ùdi ùmukùpa mu mudilu, ne ùmusaamisha bikolè, ne bikwàbò.” Yèyè ne: “Mvwa mulwè nendè kùdi bayiidi Bèèbè, kàdi kabàyi mwà kumwondopa to. Kàdi mèmè—mèmè—mèmè kwela meeji ne . . .”

⁵⁴ KwambaYè ne: “Mèmè ndi mwà kucyènza, wèwè mwitàbùùje. Mpindyewu, Mèmè ndi ne Bukolè abu munda Mwanyi,” Yèyè ne, “bwà kucyènza, bu wèwè mwà kwitabuujà aci.”

⁵⁵ Nzambi mmufwànyinekù kulekela bantu baneka kùdi kànsèrè bàdi basòmbe apa mu dindà emu abu, bàdi baneka, beela mu malààlù kùdi kànsèrè, ne kànsèrè kàà mu mashi, mabèèdi, ne ntàtu, Nzambi mmufwànyine kubòndopa bòbò kàdi kukupita wèwè anyi? Kì mbifwànyine kwenzeka to. Nànsha. Nwamònu anyi? Mpindyewu, Yèyè kàtu ùpangila to. “Ndi mwà kucyènza, wèwè mwitàbùùje.” Yèyè wàkamba cinyi?

Bwalu bintu byònsò bìdi mwà kwenzeka,
ànu . . .

Mpindyewu, Mwanèètù Tyler, lwà kùneeku . . . ? . . .

Mpindyewu itàbùùjà ànu nàka, itàbùùjà ànu
nàka,

⁵⁶ Mpindyewu, pàndi nsambila apa, ndi muswè bwà nwènu kutentekela bantu byanza. Cìdi cibàkèngelà nànsha ciikàle cinyi, . . . ? . . . ne kupweka buludi ne mulongo.

⁵⁷ Mwanèètù Neville, wèwè ikàlà ulaaba maanyi, nènku bânà bèètù bòbò . . . ? . . .

⁵⁸ Ndi muswè bwà bantu bònsò, mu batèèleji amu, nwikalè ne mitù yènu miinyika mpindyewu. Bantu bònsò mu disambila dyà mu ndòndò.

Nàka . . .

⁵⁹ Mukalenge, ikàlàku ne luse, mmùndi ndòmba, ne ondòpàku bantu aba, mu Dîna dyà Yesù Kìlistò. Amen.

Mu Dîna dyà Yesù wa ku Nazalèetà . . . ? . . . [Katùpà kàà mukàbà wà mèyi munda mutupù—Muf.]

⁶⁰ Bààbùngì be, mu mulongo awu, ndi mbàtàngila, bwà kumòna dibìnduluka dyàbò dyà mùvwàbo, kumòna mùdìbo bàbìnduluka ku cyenzi kampànda. Nwamònu anyi? Kùdi cintu ne ncyenzi, bajuukè balwè kumpàla eku. Cìkwàbò cintu, mmùdìbo bàbìnduluka ku cyenzi cìdìbo benzè aci. Paanyimà

pàà bamanè kufika mu mùshindù wà biitabuuja, ne, piikalàbo babàsambidile, nebòndopiibwè, díbà adi nùtangilàayi nùmonè dibìnduluka dyà ku cyenzi cyàbò.

⁶¹ Mpindyewu, mpaasàtà wetù ùdi ne diyiiisha dímpè bwètù twètù, mùndì mutwishùbwe, mu dindà emu.

⁶² Cintu cimwèpelè cìndì njinga kwelapù nsèke mu katanci kakesè emu, cívwa ncyà nsongàakàjì kampànda mwena Kàtòlikè udi mwimàne ku cyoshelu kwàka. Kwénjì matùkù makesè àvwàye kwànyì kumbèlu, yèyè ne bàyendè. Ne ndi mumanyàngàne ne bàyendè kùkaadi cikondo kampànda. Ne—ne kùvwa cintu kampànda patùvwà basòmbe mu muyiiki wà bàbìdì.

⁶³ Ki patùvwà bapetèle cikèènà-kumòna. Ki patùvwà . . . Mwwa ne ciibidilu cyà kucyènzela kaaba aka mu èkèleeziyà emu, kàdi bìvwa byangàte dindà dyònsò, ne bikwàbò. Nènku ewu cívwa mwaba awu.

⁶⁴ Ncívwaku mwambè kantu nànsha kàmwè to, bwalu mùvwàye mwànà wa bakàjì, cikwàbò cintu, ùvwa misangu yònsò ànu mweyèmène èkèleeziyà wa Kàtòlikè, ne bikwàbò. Kàdi kwakulayè bwà mamwèndè. Nènku mu ciinè cikondo aci, mèmè kumòna cikèènà-kumòna cyà mamwèndè awu. Mèmè kumwambila lutàtù lùvwà naalù mamwèndè, ne kuumvwija mùvwàye, ne mmwènekulu uvwà nendè mamwèndè. Mu bushùwà bwà bwalu, yèyè nguvwa mukòshi wa bwalu abu, bwà ne cívwa cilelèlà anyi kacívwa cilelèlà. Kacya ncívwakù mwanjì kumòna mamwèndè awu to, kacya bàndela. Yèyè mmumanyè nànkù.

⁶⁵ Nènku nsongàakàjì awu, mu dindà emu, mmulwè ku cyoshelu eku mwimàne, bwà kwenzayè ditonda, ne kwitaba Kilistò bu Musùngidi wendè. Mmucyènzè ku cyoshelu, mu dindà emu.

⁶⁶ Mwanèètù Neville, kàyi mumanyè to, kumulaabayè maanyì. Mùshindù mwinè—mùshindù mwinè wùdì Nzambi wènza mudimu's wè! Mumwelè maanyì, a babèedi. Kàdi tàngilàayi dikwàtà dyà mudimu dyà Nyumà Mwímpè. Mpindyewu, bu mùvwàye mwediiibwe maanyì, kàyi cyà bushùwà mubèedi to, kàdi kwediibwayè maanyì. Nudi numòna mùdìbi byènza ne byònsò bikwatè mudimu mu mùshindù mujaalàme anyi? Mpindyewu yèyè ùvwa mwimàne bu mwena Kilistò, paanyimà pàà yèyè mumanè kulwa citùdì twitabuuja ne nkwikala mwena Kilistò aci. Mpindyewu, kwambayè ne: “Udikù mwà kusambidila mààmù anyi? Ùdi ùsaama.” Ncintu cimwècimwè aci. Pa nanku dilaabiibwa adi divwa dilaaba kumpàlà kwà díbà.

⁶⁷ Mèmè kudyàmbidila, mùshindù mwinè wùdìbi bikumbànàngàne's, ne, nwamònu's, muntu mucikàle ùfùma ku disùngidiibwa. Kilistò wàkangata kaaba kèètù bònsò. Yèyè ùdi wàngata kaaba kàà bònsò. Ne nsongàakàjì ewu mmwenzè ànu

ùlwa mwena Kilistò, pashiishe ùmba ùjinga kwangata pèndè kaaba kàà muntu kampànda, bìleeja ne Nyumà wa Kilistò ùdi ùlwa munda mwètù patùdi cyà bushùwà tusùngidiibwa. Mpindyewu, abi's mbilenga byà menemene. Ncyà bushùwà ne mèmè—mèmè ndi ngaanyisha aci, nyumà mulenga wa bwena Kilistò wa kwitabuujà awu. Mpindyewu, vùlukàayi ànu cyanààna.

⁶⁸ Mpindyewu, bwà nsongàakàji ewu, udi mwaba kampànda mwab'ewu, ne bwà inàbànzà mukwàbò mwena Kàtòlikè uvwa mulwè. Nènku ndi njinga kwamba mèyi aa, ànu kumpàlà kwà kwalujila mpaasàtà wetù bulombodi bwà disangisha, nwamònu's, bìdi mùshindù ewu:

⁶⁹ Mpindyewu, èkèleeziyà wa Kàtòlikè musangu kampànda ùvwa ànu bu èkèleeziyà ewu. Nwènù baalùkile ne babalè Bible, citùdi twitabuujà, ne nudi bamanyè ne èkèleeziyà wa Kàtòlikè nguvwa Èkèleeziyà wa kumpàla. Aci ncyà bushùwà. Kàdi's wàkaseesuka kuya kule ne Malongesha Èndè. Eci ki cìvwa dilongesha dyà èkèleeziyà wa Kàtòlikè. Kàdi, nudi numòna's, bàdi ne mikàndà mikwàbò nkàmà yisambòmbò ne byà mu njila yidi baapaapà ne bakwàbò bafùnde, yidi bwàbò bóbò yà cijila ànu mùdi Bible ewu amu.

⁷⁰ Pa nàнку, nwamònu's, cìdi eci nùнку, kwèna mushintùlùke to. Cyùdi mwenzè aci, udi ufùma ku dikùdimuna dyà mucimà. Nwamònu anyi? Mpindyewu wèwè mwangàte. . . Mu bushùwà bwà bwalu, ngeela meji ne pàmwàpa bàmwè bàà kunùdi, bàbìdi abu, mu dindà emu, bàvwa mbakàji. Nkufwànyine kwikala beena Kàtòlikè balùme basòmbe kaaba aka.

⁷¹ Bu nwènù mwà kwalukila ku maalu-malonda a èkèleeziyà, wèwè mufwànyine kukonka nsaserdòsè webè awu ne: “Cyenzedi cyà bàpostòlò aba mu Bible emu, cìvwa mmùshindù wùvwa. . . Ki cìvwa cyà beena Kàtòlikè bàà ku cibangidilu anyi?” Neàmbe ne: “Èyowà.” Ne aci ncyà bushùwà. Ki cìvwbò. Mpindyewu, bóbò, tàngilàayi ne nntèndeleele mu mùshindù kaayi uvwabò nendè. Bàvwa bàdisangisha mu mwaba mukèsè, mupwekèle. Kabàvwakù bàmba ne: “Mwoyi Màriyà” anyi “Taatu wetù” to. Aci ncilèlè cyà èkèleeziyà. Bàvwa bàmba cinyi? Bàvwa bàtùmbisha Nzambi. Bàvwa bèèla mbilà mikolè. Bàvwa bèèla mbilà.

⁷² Tàngilàayi mu Byenzedi 2 emu, pàvwa Mùpostòlò wa cijila Peetèlò, ne Yakòbò, ne Yone, ne bònsò pàmwè. Bible mmwambè ne bàakaakula mu myakulu. Ne bàakeela mbilà mikolè, ne bààkenza mene maalu mu mùshindù wà—wà ne bàvwa buujìbwe tètè ne Nyumà mu mùshindù wà ne bààkenza maalu bu bakwàcìke maalà, ne nànsha mene bantu bàà pambèlù bààkakonka ne: “Bònsò aba kî mbakwàcìke maalà anyi?”

⁷³ Ki díbà adi Peetèlò, mùpostòlò, Peetèlò Mùsantu wa cijila awu, pàakiimanàye apu, wàkamba ne: “Balùmyàna ne

bâna bèètù, bantu aba kí mbakwàcike maalà to, kàdi mbùle tètè ne Nyumà,” mùdi—mùdi Bible mwambè ne mmùvwàbo amu. Mpindyewu, ki èkèleeziyà wa kumpàlà wa Kàtòlikè awu, bilondèshile dilongesha dyàbò.

⁷⁴ Mpindyewu, nudi numòna’s, paanyimà pàà bidimu bitwè ku nkàmà yibìdì, bantu banènè bàakabanga kubwela mu èkèleeziyà. Pashiishe cyàkenzàbo ncinyi? Bàakenza bulongolodi bwàbò bwà kumpàla ku Nsangilu wà Nicée, mu cidimu cyà 606 cyà bikondo byètù ebi. Bàakenza byàbò... Pàakenjiibwà Nsangilu wa Nicée ku Nicée, ku Loomò, bàakabanga kubweja bantu bàà myânzù mitumbùke bônso, ne *bàakakwatakaja* èkèleeziyà kampànda, ne *bàakenza* èkèleeziyà kampànda.

⁷⁵ Paanyimà pàà aci, yèyè kukòsoloka misangu yinaayi anyi yitaanu. Bàakuumuka—bàakuumuka ku aci, kuyabò ku mwèpiskòpò; kuumuka ku mwèpiskòpò, kuyabò ku paapà. Ne kuumuka ku aci, kufikabò ku Orthodexe wa cyena-Ngelikà ne mishilèshilàngàne, too ne mwàkakòsolokàbo, too ne kunùkaadi bamumòne leelù ewu eku. Ùdi ànu mu dikòsoloka dyà mshindù yònsò.

⁷⁶ Kàdi citùdi twètù tuteeta bwà kwenza, mulundà wanyì mwena Kàtòlikè... Wamònu’s, s’tudi pèètù beena Kàtòlikè, twètù tudi beena Kàtòlikè bàà ku cibangidilu, bàà ku ntwàdijilu abu. Ne èkèleeziyà udibò bàtùbùkila mpindyewu awu, nangànangà, bàdi bàtwàmba bu ne tudi beena Mpenta, mbwalu tudi twitabuuja dibènesha dyà Mpenta.

⁷⁷ Ki pàakavwijiibwà èkèleeziyà wa Kàtòlikè bulongolodi mpòpò apu. Ne mu malongolodi ètù a Mpenta, leelù ewu, bu—bu buloba ebu bufwànyine kushàala kàbìdì bidimu nkàmà yitaanu kumpàla eku, bulongolodi bwà beena Mpenta ebu’s bufwànyine kwikala bwà kwisùkwisù kutàmba ne mùdi èkèleeziyà wa Kàtòlikè wa cyena Loomò leelù ewu emu. Bùdi bùtàmba kuya ànu kule, mùshindù wùmfwèwùmfwè awu. Ne pàdìbo bàdyenza bulongolodi, bàdi bàbùvwija diswa. Ne pashiishe bàdi bàlwa ànu diswa, ne bidimba, ne misùukà kayiyi mikùdimùne mucimà to.

⁷⁸ Kùdi bâna bèètù bàà mushinga mukolè, bàà balumè ne bàà bakàji, kunùdi bônso aku. Mèmè bu musadidi wa Nzambi, ncitukù mwambè eci kwónso eku to, pa buloba, mu èkèleeziyà ewu, ncitukù mucyàmbè to. Kàdi mèmè bu mupròfetà wa Mukalenge, ndi nnwàmbila ne: “Bukênkè mbwòbù ebu. EndèlaayiMù.”



DIITABUUJA LUA61-0813

(Faith)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dindà, mu matùkù 13 a ngondo wa mwandamukùlù, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org